

ALAHADY FAHA 04 MANDAVANTAONA - B



« *Fantatro raha lanao, dia ilay Masin'Andriamanitra* » (Mk. 1: 24)

Ry Kristianina havana, mitohy ny fandalinam-pinoantsika amin'izao mandavantaona izao. Tamin'ny Alahady fahatelo lasa teo dia nohalalinintsika fa ny tarehy ratsy tsy azo hovana fa ny toetra ratsy azo hovana. Io fitondran-tenantsika ratsy io izany dia azontsika hovana raha mibebaka isika izany hoe mitoetra ao amin'Andriamanitra, ao amin'i Jesoa ary i Jesoa mitoetra ao amintsika. Raha miova ho tsara ny fitondran-tenantsika dia hamokatra voa tsara isika ka ho feno hafaliana sy fiadanana.

Izany no antenaintsika eo ampivakivakiana izao taona pastoraly vaovao izao.

Amin'izao Alahady tsotra faha 4 mandavantaona izao dia mametraka fanontaniana amintsika ireo vakiteny telo : “Iza marina i Kristy ? ary inona no anjara toeran'i Kristy izay eo amin'ny fiainantsika ?”

Mitoetra ao amin'i Kristy ve tokoa isika ary i Kristy? Izy ve no hifikirantsika ka hitondra antsika amin'ny tena famonjena sy hampamokatra ny fiainantsika dia hahazoantsika ny fiadanana sy hafaliana feno. Ireo no fanontaniana tian'ny Eglizy halalinintsika amin'ny alalan'ireo vakiteny telo izay arosomy amintsika amin'izao Alahady faha 4

mandavantaona izao.

Vakiteny I : Det 18, 1 5-20

Tononkira : Salamo 94

Vakiteny II : 1 Kôr. 7, 32-35

Evanjely : Mk. 1, 21-28

Ny bokin'ny Deteronoma no mamaritra amintsika inona ny atao hoe mpaminany ? Inona no ilàna ny mpaminany eo amin'ny fiainantsika ?

Ny Eglizy dia mpaminany ary araka ny famaritana eto

ny mpaminany dia izay mahalala ny sitrak'Andriamanitra satria miombona amin'Andriamanitra izy, ny fianany manontolo dia ao amin'Andriamanitra sy miaraka aminy ary ao aminy ka izany no afahany -manambara ny sitrak'Andriamanitra. Izany indrindra ry Kristianina havana no azo lazaina fa tsy misy amin'izao andro iainantsika izao ary tsy nisy koa tamin'izany fotoana izany ka nahatonga ny vahoaka

nimonomonona tamin'Andriamanitra, tsy hoe tsy nanao ny asany i Moizy fa maro ny olana nisy tamin'izany fotoana izany ka tsy arakany intsony no miatrika azy.

Mampahatsiahy izao andro ianantsika izao-koa . Andriamanitra raha nilaza tamin'ny alalan'i Moizy hoe : “ *Hanangana Mpaminany anankiray tahaka ahy eo afovoanao, eo amin'ny iray firenena aminao, ny Tompo Andriamanitrao* ” Ny mpaminany dia ilay mpitondra ny tenin'Andriamanitra, mampita ny hafany mba hanova ny fiainantsika ka hanana fitondran-tena araky ny lalan'Andriamanitra sy ny teniny ka amin'izay hirindra sy hilamina ny fiainantsika raha mihaino ny feony isika.

Aoka àry hanararaotra izao vanim-potoana izao isika handalina ny finoantsika izany hoe hihaino ny feon'Andriamanitra tahaka ny nataon'ireo vahoaka tamin'izany fotoana izany ary nahatsapa izy ireo fa tò teny eo amin'ny vahoaka i Jesoa. Ny mpaminany, ny Eglizy koa andrasantsika mba ho toraka izany koa , ho tò teny tohoteny ary izany ihany koa no andrasana amintsika tsirairay avy, mamokatra tahaka an'i Jesoa.

Aza gaga isika fa misy ny tsy manao ny dingana hirosoana amin'ny lalindalina tokoa, maro ny nihaino sy natoky ny fampianarana nataon'i Jesoa fa misy amin'izy ireo tsy nanao ny dingana ka tsy nandray azy nanova fitondra tena.

Maro koa ireo mety mitory an'i kristy dia mety mivily lalana ihany koa, ny zavatra tadiavina amintsika dia ny fibebahana. Henontsika tamin'ny Evanjely fa ny demony nanaiky an'i Jesoa ; “ *mivoaha amin'io lehilahy io ianao*”, nankato azy ny fanahy maloto satria tena manana fahefana tokoa izy. Tsy hoe amin'ny teniny ihany fa amin'ny ataony koa. Nanaiky azy ny demony ka niala tamin'ilay olona ka taitra ny olona rehetra nahita izany satria na dia ny fanahy maloto aza niaiky azy.

Ny fianarana azontsika tsoahina amin'izao Alahady faha 4 fandalinam-pinoana izao dia ilay ambaran'i Md Paoly “ *raha miombona amin'ny Tompo tokoa isika dia hikatsaka mandrakariva ny momba azy*” izany hoe ny fiainantsika manontolo dia fiahiana sy fiderana ny Tompo, hahatonga ny Tompo eo anivon'ny fianantsika mba hankalaza azy isika sy ireo manodidina antsika satria izany no atao hoe mpaminany.

Manana modely isika, manana mpivavaka mitovy amin'izany mpaminany izany isika. Araka ny efa fantatsika sady efa akaiky ny fananganana an'i Lucien Botovasoa ho olontsambatra. Hivavaka isika mba haninteraka amin'ny fiainantsika tsy ho zavatra ety ivelany fotsiny ny fankalazana fa mba ho modely ho antsika izy amin'ny maha mpaminany azy satria ny fiainany manontolo dia nitoetra tao amin'i Jesoa ka nanambara an'i Jesoa ankasahiana izy sy vonona mandrakariva nitory azy. Lehilahy marina izy ka tsy nisalasala niaina ny fahamarinana araky ny fampianaran'i Jesoa sy nizara ny vaovao mahafaly tamin'ny fanehoana ny tena fitiavana marina amin'ireo manodidina azy ka nahatonga azy nantsoina hoe Rabefihavanana.

Aoka isika handalina ny finoantsika hahatonga antsika hiahy mandrakariva ny momba ny Tompo mba ho masina isika araky ny voalazan'i Md Paoly.

Masina isika raha eo anivontsika i Jesoa satria hangina ny ratsy, handresy ny ratsy isika raha miombona amin'i Jesoa amin'izay ireo manodidina antsika dia hahatsapa fa i Kristy no tena fiainana ary i Kristy no hahazoana hasambarana sy hafaliana.

Ry Jesoa Tompo ô, fahasoavana tokoa ny fihaonana aminao sy ny fihenoana ny teninao, fahasoavana ny mahalala anao ary ny manaraka anao no hasambarana satria mitoetra ao aminay ianao ary izahay ao aminao ka amin'izay dia mamokatra tokoa ny fiainanay. Ampio izahay tsy hanompo zavatra hafa fa hanompo anao ary hiahy anao amin'ny fiainanay satria raha manao ny asan'Andriamanitra izahay dia manao ny asanao sy manatanteraka ny sitraponao dia ianao no hanatanteraka izay asa hahasoa anay. Ampio izahay mba hiroso amin'ny lalindalina tokoa hihaina ny finoanay ka na inon-kidona na inon-kiatra dia ho tahaka an'i Lucien Botovasoa izahay, hijoro ho vavolombelonao eo amin'ny manodidina anay.

Ry Kristy zokinay, efa nampahafantarinao anay tokoa ny halehiben'ny asa nanirahana anao tety an-tany dia ny handresy ny ratsy izay mikiky anay dia ireo aretina manapotika anay koa mba ataovy tsapanay sy tsapan'olona mahita ny ataonay sy mandre ny teninay fa ianao no hany famonjena. Mba ho mpaminany manatanteraka ny sitrak'Andriamanitra tokoa izahay, manambara fa ianao no lâlana sy fahamarinana ary fianana.

Ry Jesoa Tompo ô, mitoera re eo afovoanay ka ianao no hampamokatra ny fiainanay ka na inona ataonay sy teninay dia mba ho fampitrahofana ny finoanay sy ny fiainana andavanandro. Amen

Mompera Arseveka Mgr Benjamin Ramaroson